



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tir\_yimyim

tir yimyim TAPAK 8

**EU nung Moldova züngsem akumtsü**

**Archery World Cup: Deepika Kumari-i silver medal angu**



VOL. XXII ISSUE NO. 13 (ADOK 13) DIMAPUR SANGTENNÜ (TUESDAY) MONGPUTENI (OCTOBER) 22, ₹ 5.00

## CSU-i Pfutsero nung NHIDCL office shibangtsü Nagaland nung Police Commemoration Day among

**Kohima, October 21, 2024 (TYO):** Chakhesang Students' Union (CSU)-i ghonda 48 züngzüksüba tembangba sülen Pfutsero nung NHIDCL indang PMU office shibangtsüogo.

"October 16 nü CSU-i ghonda 48 tsüingda Kohima-Jessami road, talisa Chakhabama-Kikruma stretch nung lenmang kanga mejungi aliba yangluang ta PMU-Pfutsero NHIDCL nem mapan züngzüksü" ta CSU president Pfhulo Sara aser general secretary Kuzoto Swuro nati ashi.

CSU-i lenmang noktanga aliba lapoktsü, ongkentem nembangtsü aser kilentzü ayimdak anepalutsü takhangba agüja liasü.

Ajisüaka, CSU-i October 19 nü tesem semdanga senzüdang repair & maintenance work kanga mejungi inyaka aliba ajitet

ta CSU mendenpurtemi ashi.

October 16 nü 2nd Union Assembly alidang mezüngbuba lungkak aitba shilem nung Pfutsero nung NHIDCL indang PMU office shibangtsü bangjemtepa liasü ta tenatisa ashi. Mezüngbuba lungkak aitba shilem ya anentsüh aser tenokdangba ajak magien tashi, ongkentem menembang tashi aser kilentzü ayimdak shitik meyanglu tashi agitsü ta CSU mendenpurtemisa ashi.

June 13, 2024 nü Phek district PMU-i ashiba ama Ratna Infra Projects Pvt. Ltd. den contract agreement agientsüla ta CSU-isa takhangba agütsüogo.

Item mapa meinyakra CSU-i NHIDCL aser Contractor anema mapa inyaksüsa akumtsü ta parnokisa tekümdangtsü olen ka shiogo.



**Kohima, October 21, 2024 (TYO):** Nagaland-i linük den külemi Police Commemoration Day mongogo aser iba mapang Naga nunger pezü dena linük nung police 214 nem tetushi agütsüogo.

Nagaland Police nungi tasütaitertemji Constable (Driver) Khetopu Awomi, 14th NAP (IR) Battalion, Kiphire aser 10th NAP (IR) Zhadima nung Hav A Nikiye Tsuipu, Constable (GD) Wetelhou Losou o Constable (GD) Akangluba nunger lir.

"Police-i nübertem tenzüksü tezüngzüktep agishitsüla. Tanü ya mangyimba anogo dang masü saka pei asoshi mebilemba police temi taküm bendanga agütsüba atema benjungteper" ta DGP Rupin Sharma-i ashi.

Tesüiba küm ka tsüingda India nung police 214-i linük kümzüka ayutsü atema parnok taküm bendanga agütsüogo. Nagaland Police nungia par pezüi parnok lemzüka mapa inyakdang taküm bendanga agütsüba atema tetushi agütsür, ta pai ashi.

"Maneni, Nagaland Police personnel ajaki tesüiba küm ka tsüingda kanga meranga inyaka aruba atema pelar aser tenüngsang agütsür. Nenoki benjung aser kibongtem den mapang endoktsü melena state nung alirtem tiptema lidaktsütsü atema mapa inyakogo" ta DGP Nagaland-isa ashi.

Nagaland Police-i law & order mapa inyakba dang masü saka State assembly election aser Lok Sabha elections 2024 nung shilem agia liasü ta paisa ashi.

## AYO-i NSCN (K) Khango den amalitep malitsü

**Dimapur, October 21, 2024 (TYO):** NSCN (K) Khango-i nangzükba ama meinyakba atema Angami Youth Organisation (AYO)-i parnok den amalitep malitsü ta metetdaksüogo.

AYO aser NSCN (K) Khango tsüingda ken o angatetteptsü atema August 20, 2024 nü onük pezü tenangzüktep agia liasü. NSCN (K) Khango-i mepishiba sülen Ceasefire Monitoring Group/Ceasefire Supervisory Board (CFMG/CFSB) ajanga iba tenangzüktep agiba nung yaritepa liasü.

Iba agreement nung Point No. 3 nung NSCN (K) Khango-i "Max Naga" ta ajaba nisung

indang maitsü metetdaksütsü aser anogo 15 tsüingda pa dak disciplinary action agitsü nangzük. Ajisüaka NSCN (K) Khango-i mapang süiaka nangzükba ama mapa meinyak ta AYO-i metetdaksü.

AYO-i lennir taintem aser regional units pezü- Southern, Northern, Western aser Central Angami Youth Organisations den asüngdangtepba sülen August 20 agreement nung lateta aliba ama inyaksü lemtet. Anungji "Max Naga" dak sendakba onüktem meinyak tashi NSCN (K) Khango den amalitep kecha malitsü ta parnokisa metetdaksü.

## Lok Sabha MP, S. Supongmeren Jamir-i N.U Lumami campus semdang

**Mokokchung, 21st Oct (TYO):** Education-ji tashi (power), iba ajanga nisung ka taküm aser lokti melenshidaktsür, anungji, ne tashi jagi alima raksatsü asü alima yanglutsü asoshi amshir, aji joko nenok dak keta lir, ta metetdaksü.

Iba o ya Nagaland Lok Sabha MP, S. Supongmeren Jamir-i Nagaland University Lumami Campus 21st October, 2024 nü semdangba mapang metetdaksü.

Pai tanü iba university semdangba ajanga otsü tasen ka yangluogo, kechiyong Nagaland nungi MP shingia N.U Lumami semdangba otsü mali, ta yangji inyaktertemi metetdaksü.

Tanü I. Ihoshe Kinimi Hall

nung sentong agidang, Lok Sabha MP-i Nagaland University nung Centre of excellence for Christian studies, cross cultural studies aser samatsü lendongbang nung aliba Naga nunger oshi (endangered Naga languages) item atema centre amenoktsü asoshi tebilemba ka lemsatet. Item centre-tem amenokba ajanga lenmang aisü nung tajangzük angutsü imlar, ta pai ashi.

Centre amenoktsü tebilemba benokbaji N.U Lumami vice Chancellor Prof. Jagadish K. Patnaik aser yangji inyaktertemia junger ta agizükba osang angazüker.

Pai tanü N.U Lumami semdangba ya pa shisa aneti aruba

lir, ta ashi. "Nagaland meyonga MP ka ama India lima tenzüksü asoshi nenok nungi shisatsü, temetongshitsüba aser tajungshiba aginür", ta pai mepishia ashi. Tsüngremer taochi aser nübur teyaritep ajanga MP adok, anungji, iba menden nung kopika tenzükdir nübur nungi tenungitba maneni akanger, ta paisa shisem.

Education ya tashi (power), iba ajanga nisung ka taküm aser lokti melenshidaktsür, iba ya lira ne keti tashi arur, aji oda, iba ajanga alima raksatsü aser yangluba nunga amshir, anungji, nenok koba nung amshitsü renemer, ta paisa kaketshirtem dang asüngdanga ashi.

(Maneni tapak 2 nung...)

## DGP Sharma-i NSCN-K Nikki dang par züngsemtem agütsütsü mepishir

**Kohima, October 21, 2024 (TYO):** NSCN-K Nikki Sumi teloki October 10 nü Dimapur nung shishilembar ana pur aoertem ozüing amertem ket nung agütsütsüla ta Director General of Police (DGP), Nagaland, Rupin Sharma-i ashi.

Police Commemoration Day nung DGP Rupin-i osangbener den jembidang Nikki teloki nisungpurtem aputsü atema inyakba mapa nung yariteptsüla ta ashi.

"Nikki teloki police aser public den tesentaktep tajung yanglutsü tang ya mapang tajung lir" ta pai ashi.

"Onoki iba tatalokba atema bushisüngdanga aruba nung takok ngua arudar aser telungpur maitsü jangjaogo. Police-i telungpurtem aputsü atema bushir saka parnok atsükogo" ta DGP Rupin-isa ashi.

Ozüng alema inyaktertem miimbanga ayurtem merenshitsü. Police-i iba

tatalokba nung shilem agirtem indang osang tejangja metetdaksüogo aser senpet agütsütsü shiogo, ta paisa ashi.

Nisungpur aoba inyakyim ya kanga bulua inyaker aser iba jagi onoki Assam Rifles aser tanga agency tem den amalitepa uniform aser civil nung mapa inyakdar ta Rupin Sharma-isa ashi.

"Dimapur aser Kohima aser tanga tesemtem nung Naga telungpur teloktemi sen yong nisungpur aoer. Aiben nisungtemi ken o mebenokteter saka tia kaa Nagaland nungbo kin teloktem, civil societies aser NGOs lir anungji parnok ajang ken o benoktsü mepishir" ta paisa ashi.

"Public-i police dak temulung tali alemtsüla aser NGOs ajanga ken o tem benoktsüla. Onoki akokba tashi inyaka arur saka public-i otiotia police dangi arua osang sangoktsütsüla" ta Rupin-isa shisem.

"Naga telungpur teloktem aser

India sorkar tsüingda ceasefire ground rules nung sign sütepa lir. CFRG maparen ya melenshia aotsüla, mapa inyakdang khuret kar ajurura reprangshitsü. Ano metokmeperi kar ajanga telungpurtem aser sorkar agency temi alia inyaksangshitsüsa lira itemji agientsüla" ta DGP Rupin-isa ashi.

Nüngdak süra Nagaland sorkari iba onük atema Centre den jembitsüla ta paisa shisem.

### War Against Drugs:

"Nagaland Police-i War Against Drugs takok ngua inyaka arudar. Nagaland nung drugs shibelenba kanga ajema kümogo saka inyakdar. Mozü shibelenertemi truck garitem amshir aser Manipur nungi Assam tashi senzüba truck gari noklang aika lir anungji osang tejangja ka melira truck ajakbo mereprangteter" ta Rupin-isa ashi.

Manipur nung drug shibelener nisung 100 shi puteta lir saka tensa majungba ajanga

asere Manipur Police-i law & order tebilemstü ketdangtsüba ajanga parnok ano pua marutet lir, ta pai ashi.

Myanmar nungi Eastern Nagaland district tem ajanga Nagaland-i drugs bener arur. Tesüiba ita 4-5 tashi Nagaland Police aser Assam Rifles-i Myanmar nungi Dimapur aser Mon o Longwa dena eastern district temi drugs shibelenertem puogo, ta Rupin Sharma-isa ashi.

Eastern district tem aser talisa Mon o Tuensang nung village council temi drug shibelenertem aser parnok den yariteper maitsü jangiatepba nung yaritepa arur aser iba atema kanga pelar, ta DGP Nagaland-isa metetdaksü.

### Police constables 935:

Nagaland nung police constables 935 tasen anioxtsü atema mapa inyakdar. September 20 nü High Court-i constables shimba agientsüogo ta Rupin Sharma-i ashi.

"High Court-i Nagaland police

nung constables 935 aniokba atema ashishitep aser ibaji onük ka- advertise masüba nung ajemdaker asüngdangogo. Iba atema Court-i Nagaland police dang re-advertise asütsü aser nübo tasentem shimtsü tetuyuba agütsüogo. Onoki mapang shitik nung advertise asütsü" ta pai ashi.

Department-i fresh recruitment atema mapa inyakaka mapa nungi anentsüba constable temi ozüingi melaba ama teyari bushitsü akok. Parnoki Gauhati High Court (GHC) Kohima Bench, GHC Principal Bench mesüra Supreme Court dangi review mesüra revision petition agütsütsü akok, ta Rupin-isa ashi.

"Court-i tuyuba ama administrative process inyakdar aser iba ya ita trok tsüingda tembangtsüla saka constables-i parnok ajangzüksüsa tetuyuba kar ngura ta ser department-i mapang tatsüka atatsü" ta paisa ashi.

### NE nungi kentener trok-i Yunnan Province, China nung shilem agi



**Dimapur, Mongputeni/Oct. 21 (TYO):** Northeast India nungi nungtugu kentener nisung trok-i tawa China southwest tsütsü Yunnan Province nung October 12-20, 2024 anogotem cultural exchange tour nung shilem agia liasü.

Iba delegation ya Kolkata nung aliba Consulate General of China ajanga jaoka liasü, koba India aser China tsüngta sobaliba tsütsü teka amteper inyakba nung shilem ka lir.

Northeast India nunger aortem ya James Swu - ken mejemer, Conductor aser Music Teacher; Nise Meruno - Yamaha Brand Ambassador aser Concert Pianist; Alobo Naga - Award balala ngutetba kentener aser ken mejemer; Guru Rewben Mashangva - Padma Shri Awardee aser Folk Singer; Nungshitula Pongener -

ken zülur aser mejemer aser Merenyala Pongener - kentener, Lecturer & Registrar ETI Nepal nungertem liasü.

Parnok tour ya Yunnan Province yimtiba Kunming nung tenzük, kong parnoki cultural exchange sentong ka nung shilem agia liasü.

Yangji parnok aonung ana amungdang parnoki Yunnan Minzu University nungi tesayur aser kaketshirtem ajuru aser Yunnan Academy of Social Sciences nung shisashir den sobaliba otsü sensaksema liasü.

Iba mapang parnoki kangadang nungtugu dance musical Dynamic Yunnan nung dena liasü, kong Southwest China indang sobaliba balala sayur.

Iba sülen parnok ya Mangshi City, Longchuan County aser Ruili City semdanga sentong

balala nung shilem agia liasü.

Parnok ya Kunming-i meyipa shilangba sülen Yunnan Musicians Association nungi kentener tem den cultural exchange sentong ka nung shilem agia liasü.

Kolkata nung aliba Consulate General of China nung director, Bilateral Section, Zhang Zhizhong-i ashiba agi, 2024 küm Yunnan semdangtsü asoshi consulate ajanga ayongzükba ibai tasembuba liasü.

April ita Indian Buddhist monks temi semdangba sülen July ita China-South Asia Cooperation Forum nung kentener aser scholars temi semdanga liasü.

Iba ama sentong yagi Northeast India aser Yunnan Province, China tsüngta tesendaktep tali akangshitsü asoshi tongtipang mera agiba sayur.

**CANSSEA-i lokti nübutük sentong nung shilem agitsü ayongzük Dimapur, Mongputeni/Oct. 21 (TYO):** Confederation of All Nagaland State Services Employees Association (CANSSEA) ajanga vision 2024-2027, Resolution No. 2 Clause B nung sorkar mapa inyaker asoshi sanitation awareness asoshi shia aliba nung ajemdaker state sorkari

October 25, 2024 nü mürekmejuba sentong ayongzük aliba nung State Headquarter nung aliba züngsem ajak adentsü ayongzükogo. Iba sentong ya anepdang 7:00 ako nungi tenzüksü aser department shia tesem balala lemsaja lir.

### Lok Sabha MP, S. Supongmeren ... (TAPAK 1 NUNGI...)



Lok Sabha MP, S. Supongmeren Jamir

Tanü asen lima ya teraksa agi süngogo, anungji, nenok iba university nung zünger mapa balala inyak dang teraksaba nung adentsü asü yanglushiba nung adentsü? "Nai shimtsüba dang", ta paisa bilemdangtsü asoshi onük ka lemsatep. "Nai alima raksabaji meteta lir, saka nai yanglushitsü asoshi khuret mebenra/mebentetra nai kodanga temelenshi bener marutsüet", ta pai ashi.

"Alima raksar alibatem ya tarutsü nung nenoki abentsü, anungji, nai temelenshi nungdaker ta ajitetra, iba atemaji inyaksüla, na temelenshi atema inyaker ka mesütetra temelenshi malitsü", ta pai kaketshirtem dang temelenshi bener arur kaka

asütsü ajungshia liasü.

Pa o jembizüker külen shisatokden sensen ka liasü, iba nungji kaketshir aser tesayurtemi pai N.U Lumami semdangba asoshi pelaba den tanü Nagaland nung ajuruba talisa kaket shisashiba/shisaliok wadang, shisarokbushi (research) mapa aser lanur mapa manguba tebilemstü indang aser ano tanga onük kar nung tasüngdangba den inyakdaktünüba otem lemsatep.

Tanü iba sentong nung Kahoshe Sumi, DR. GAD menden liasü. Registrar Dr. Abemo-i tarur pelaa agizük aser Dr. Temjensosang, Prof. Department of Sociology & Director, RDC-i melepzüng o jembia liasü.

### Mokokchung nung GIDDP Day amung



Mokokchung nung October 21, 2024 nü Global Iodine Deficiency Disorders Prevention Day amungdang tangokba noksa ka nung Dr. Limanaro DPO (UIP & RCH) aser shilem agirtem angur.

**Dimapur, Mongputeni/Oct. 21 (TYO):** Urban ASHAS den lungjemer October 21, 2024 nü Conference Hall, Chief Medical Officers Office, Mokokchung nung Global Iodine Deficiency Disorders Prevention Day munga liasü.

Sentong tatsüka agidang Dr. Limanaro DPO (UIP & RCH) ajanga iba anogomung indang rateta ashi aser Iodine

Deficiency Disorder ya alima tesem ajunga nung nübur tebilemstü lir ta ashi.

India nunga IDD endemic areas nung nisung pongu nungi ka dak IDD ya lir, ta ashi. Iba timtem ya chiyongtsü nung iodine maliba ajanga adoker, koba ajanga 'simple goiter, mental retardation, stunted growth of cretinism' amala adoker, ta lai ashi.

Item timtem ya timba teti

asoshi lir saka iodized salt tajung achiba ajanga nokdangtetsü, ta ashi.

Lai ASHAS tem dang Iodine disorders, ibaji ajanga timtem ajuruba, aziüoktsü mera indang osangtem prokshitsü ayongzükba liasü.

Kasa mapang ASHAS tem dang metsü tendangba sayua liasü. Iba sentong nung L.Kilangmeren Computer IEC menden liasü.

### Kohima North Treasury nung annual physical verification alitsü

**Dimapur, Mongputeni/Oct. 21 (TYO):** Kohima North Treasury nungi pension agizükba pensioner ajunga indang 2024 küm asoshi annual physical verification ya November 11-18, 2024 aser November 18-20, 2024 anogotem anepdang 9:30 ako nungi alitsü, ta Senior Treasury Officer, Kohima North, Limatemsu ajanga sangdong ka nung metetdaktüsü.

Kohima North Treasury nungi pension agizüker ajungai book serial number repranger agüja aliba anogotem arutsüla, aser shirangba ajanga physical verification atema marutetba pensioner temi parnok indang ki address den contact number tem agütsütsüla, kechiaser item pensioner jangjatsü atema ketdangsur yoktsü, ta sangdong ajanga ashi.

Temalen shia aliba anogo dak alia physical verification atema anogo matsülangtsü aser physical verification masüba

pensioner nem November 2024 nungi pension sen magütsütsü.

Physical verification mapang PPO books, Life Certificate, Pensioners Association ajanga agütsüba ID card nungdaktüsü. Life Certificate ya Treasury office nungi agütsütsü, anungji pensioner mesüra kinunger temi office mapang meshitsü akok, ta ashi.

#### Anogo telemsa yamai alitsü: LIFE PENSION

| DATE           | SL.NO.    |
|----------------|-----------|
| 11.11.24       | 7-1260    |
| 12.11.24       | 1264-2155 |
| 13.11.24       | 2157-3060 |
| 14.11.24       | 3063-3830 |
| 18.11.24       | 3831-4399 |
| 19.11.24       | 4401-4830 |
| 20.11.24       | 4831-5229 |
| FAMILY PENSION |           |
| DATE           | SL.NO.    |
| 11.11.24       | 1-535     |
| 12.11.24       | 536-1100  |
| 13.11.24       | 1101-1580 |
| 14.11.24       | 1584-1999 |
| 18.11.24       | 2003-2340 |
| 19.11.24       | 2341-2500 |
| 20.11.24       | 2501-2890 |



Mokokchung, October/Mongputeni 21(TYO): District Executive Force(DEF), Mokokchung nung tanu India lima ajunga den külemi "Indian Police Commemoration Day" sentong Senior Superintendent of Police Vesupra Kezo NPS-i anir officers aikati Police asür 214 nem akhüm agütsüba tamaitü nara lang agüja liasü. Iba sentong temer kelen sentong nung adeneritem ajak.



October 21, 2024 nü New Delhi nung External Affairs Minister, S. Jaishankar-i Australia aser Germany na nungi MP tem den senden amendang tangokba noksa nung angur.

### India aser China nati LAC nungi sepaitem aienshitsu bangjemogo

New Delhi, October 21 (Agencies): India aser China nati 2020 kum nungi tenzuka arrtsulen mangatetep adokba ajak bentetsu atema bangjemogo, ta MEA-i metetdaksu.

Line of Actual Control (LAC) nung sepaitem patrolling senzuba dak sendakba nung Hombarnu Foreign Secretary, Vikram Misri-i, linuk anati ken o aiben jembia aruba sülen points kar nungi sepaitem aienshitsu atema melungtepogo, ta metetdaksu.

Foreign Secretary-i, anudoklen Ladakh kubok Line of Actual Control (LAC) nung sepaitem patrolling senzuba dak sendakba nung India aser China ketdangsertemi telemtetba kar agiogo, ta

metetdaksu. "Tesuiba hopta aika tsungda ken o aiben jembia aruba sülen India-China arrtsulen line of actual control nung patrolling senzuba dak sendakba nung telemtetba kar agiogo. LAC nungi sepaitem aienshitsu aser 2020 kum nungi tenzuka item area nung mangatetep adoka aliba atema bangzung kar renemogo," ta paisa metetdaksu.

Tanungba mangatetep ken o ajak bentetsu atema India aser China ketdangsertemi tesuiba hopta aika jembia aruogo. Depsang aser Demchok areas nung patrolling senzuba dak sendakba nung telemtetba kar agiogo.

Ato kilonser, Narendra Modi-i Russia semdanga BRICS Summit nung adentsu

mapang ana nung lia tang item osang ya angashir.

2020 kum June ita nung Galwan Valley nung India aser China sepaitem tsungda rara adokba sülen nungi linuk ana tsungda tesendaktep kanga mejungi akum.

Taoba ita China-i Galwan Valley nungi par sepaitem aienshitsu atema tetuyuba aguja liasu. September 13 nu China Ministry of Foreign Affairs-i sangdong ka ajanga, anudoklen Galwan Valley densema tesem pezü nungi par sepaitem aienshiogo, ta metetdakja liasu.

Hokolbarnua China Foreign Ministry-i, Russia nung senden amenba mapang nung India aser China tsungda tesendaktep tajungba akumtsu atema linuk anati amalitepa inyaksu bangjemogo, ta metetdakja liasu.

### Taila osang agutsurtem tayimtsu nung mesenzudaksutsu: Mohan Naidu

New Delhi, October 21 (Agencies): Tesuiba anogo ishika India nung tayimtsu balala bomb agi amaksu, ta osang taila kanga bulua metetdaksuba anema Hombarnu Union Civil Aviation Minister, Kinjarapu Ram Mohan Naidu-i, bomb amshia amaksu, ta taila osang metetdaksurtem 'no-fly list' nung zungoktsu, ta metetdaksu.

Naidu-isa, Centre sorkari Suppression of Unlawful Acts Against Safety of Civil Aviation (SUASCA) Act, 1982 ozung yanglushitsu tebilemba lir, ta metetdaksu.

Tesuiba hopta ka piyong India nung tayimtsuitem bomb agi

amaksu ta amokmerena arudar, aser item osang ajakji tiyazu liasu. Bomb amshia amaksu ta osang metetdaksuba ajanga tayimtsu service kanga mejungi kongshidar.

Osangbenertem senden nung jembidang Naidu-i, "Iba ya ken o akatsusa ozung alema inyakba mapa ka asutsu onok tebilemba lir," ta metetdaksu.

Union Minister-isa, aviation ministry-i Home Ministry densema tanga ministry balala den iba tebilemtsü onuk atema jembidar, ta metetdaksu.

Centre nung NDA sorkari passenger tem kumzuka alitsu atema inyaksu, ta pai ashi.

"Itemji taila amokmeren

süaka zupazupa-a toktsusula masu kechiyong inyakyim lateta lir. Airports nung security shilem 10 tali lezmüksüogo," ta pai metetdaksu.

Paisa, Centre aser Bureau of Civil Aviation Security (BCAS)-i airlines den jembidar aser BCAS-i airlines dang parnok tebilembatem asungdangogo, ta metetdaksu.

Amongnua Naidu-i, "Onoki intelligence ketdangsertem, IB aser kanga tongti ketdangsertem, talisa home affairs den tongtepratepa inyakdar. Onoki iba ya süoki ia agir aser tarutsu nung item ama tatalokba matalokdaksuner," ta metetdakja liasu.



October 21, 2024 nü New Delhi nung Ato kilonser Narendra Modi aser Bhutan Ato kilonser, Tshering Tobgay na senden amendang tangokba noksa nung angur.

OFFICE OF THE  
**YAONGYIMSEN RIONGSANGER TATAR**  
 P.O. Changtongya – 798613  
 District : Mokochung, Nagaland  
 Date : 21.10.24

**SANGDONGER**

31 buba Yaongyimsen Senso Mungdang nung Chümoukedima 1989 telok koba Senso nungi jendokogo ibaji tim mapa inyakogo ta nenshir. Aser iba ken-o ya Yaongyimsen among süngkümshi atena kecha court-ia bener aotsu makok ta ni Riongsanger Tatar-i metetdaksur.

*Jang*  
 21-10-24  
 Nungsangtoba Samen

*Saba*  
 Takosenba Samen

*Odi*  
 Odinungsang Samen

### Cyclone Dana agi Odisha, West Bengal aser Andhra Pradesh kongshitsu

New Delhi, Mongputeni/ October 21 (Agencies): Bay of Bengal nung 'low pressure area' ka lir aser October 23 tashi nung ibaji cyclonic yipru akumtsu, ta Hombarnu India Meteorological Department (IMD)-i metetdaksu.

Iba yipru tesashi ajanga Odisha, West Bengal aser Andhra Pradesh tzuyimkümlen aliba tesemtem kanga mejungi kongshitsu, ta parnoki metetdaksu.

North Andaman Sea aser Bay of Bengal nung upper air cyclonic circulation ka agi low-pressure area ka kumogo. Ibaji west-northwest tsutsuleni aotsu aser October 22 anepdang tashi nung yipru tesashi akumtsu aser October 23 tashi nung eastcentral Bay of Bengal nung cyclonic yipru akumtsu," ta met

department-isa metetdaksu. Cyclone Dana ajanga northern Andhra Pradesh, Odisha, West Bengal aser Bangladesh nung tzuyimkümlen aliba region kongshitsu.

Iba cyclone ji koba tzukim tama atongtsuar tang tashi nungbo mejangja, saka weather model ana- IMD-GFS aser ECMWF ajangabo, cyclone ji Puri tama atongtsu, ta asadangtetogo.

October 23 nikongdang tashi nungbo Odisha aser West Bengal tzuyimkümlen mopung ghonda ka nung kilometer 50 nungi kilometer 60 tashi kera aontsu.

Ano October 24 aonung aser October 25 anepdang tashi nungbo mopungji ghonda ka nung kilometer 100-110 nungi kilometer 120 tashi kera aontsu.



New Delhi, October 21, 2024: Wayanad Lok Sabha menden nungi tokteptsu atema Hombarnu Congress lenir Priyanka Gandhi-i nomination file asutsu lia lai Congress Tir, Mallikarjun Kharge ajurudang tangokba noksa nung angur.

### J&K nung kiralongrartemi amakdang nisung trok asu

New Delhi, Mongputeni/ October 21 (Agencies): Jammu & Kashmir kubok Ganderbal district nung kiralongrartemi doctor ka den aayanger pongu süogo aser aika yirua liasu.

Amongnu aonung kiralongrartem jagi tunnel project ka nung inyaker bendangertem (tanga state nungi aruba aayangertem) amak.

Sorkar ketdangsertemi iba tatalokba sashia aitsuba den külemi aibelenertem nem temerenshi tulu agütsutsu, ta metetdaksüogo.

Kiralongrartemi aayangertem dak injang khaloktsuba sülen iba tesem nungjisa aayanger ana asu aser aayanger asem den doctor kata mekümzukteti asu. Kasa tatalokba nungji yirur nisung pongu hospital nung treatment agidar.

Takum kum tenzucker tang agi pongubenbuba Kashmir nung lisopur masuba nisungtem amaker, ta ketdangsertemi metetdaksu.

Jammu & Kashmir chief minister Omar Abdullah-i iba

tatalokba aija, "Sonamarg region kubok Gagangir nung lisopur masuba aayangertem amakba osang angashia jashir. Item nisungtemji kanga tongtibang terenlok project ka inyakterem liasu. Tai maket nisungtem tepsetba ya ni sashia aitsur aser parnok kibongtem den mangyim jashi lemsateper," ta metetdaksu.

Iba tatalokba dak sendakba nung Union home minister, Amit Shah-i, iba tatalokba nung shilem agirtem dang tai matoktsu aser security sepaitemi telangzuba sashia agütsutsu, ta metetdaksu.

"Gagangir, J&K nung civilian amakba ya tasumait mapa lir aser aitsutsu tetemsu. Iba ama mapang ka nung ni takoksa angur kibongtem den mangyim jashi lemsateper aser yirua alirtem tekeraba nung aneptsu atema sarasademtsur," ta Shah-i X ajanga metetdaksu.

J&K lieutenant governor, Manoj Sinha-i, aibelenertem nem temerenshi agütsutsu atema police, army aser security sepaitem nem tashi ajak agütsüogo, ta metetdaksu.



# TIR YIMYIM

## YIMOBILEM (EDITORIAL)

DIMAPUR SANGTENNÜ, OCTOBER (MONGPUTENI) 22, 2024

### Lokti tentetba nükjidong

**N**agaland ya alima nung lokti tentet teimtiba aliba lima ka asütsü ta aikati asayamenüa jembir. Ajisüaka, shitakba nunga lokti tentet teimtiba tenteta alibaji Nagaland asütsüa akok aser Nagaland sasep nunga Naga kin rongnung lokti tentet teimtiba aliba kinji, ashiko, asen Ao kin asütsüa akok. Atangji, lokti telongjem aika tentetba nungji kecha tai mali, kechiyong lokti tentet ajakji longjemer mapa tajung inyaksü asoshi tenteter. Ibayongji, lokti tentet telongjem nükjidongji "Nebortem asoshi", "Kintem asoshi", Telongjem aser Terenlok asoshi ta nukla aser nükjidong tajung yur tenzüker. Talisa, asen lima nung tamalen yimtsüng aser tzükong shia kaketshirtem telongjem tentetba ajanga nebortem nem merükmejua alitsüba tangatetba agütsüba nungi tenzüker kaketshisatsü aser rongsen bushiba tsütsü lenmang sayutepa ajungshitepba agi asenok libaliru aser awashi yimya ajak mapang tatsüka tsüngda kanga junga melenshia otetba asenoki angur. Aji oda, asenok aliba tesem ajak nung asenoksasa tentetba asen lokti telongjem tentet alinungji mapang mapang shia benjongbentsü munga asenok pelateper. Idangji, asenok sobaliba otsü jembir aser sobaliba yar tsüngsang tajungba tajungba wazüka yua beshir. Iba ama lokti sentongji loti tentet telongjem ka melira tayongzüker malitsü aser lokti longjemer sobaliba benjong memongra iba kinji samatsü. Tanübo asenoki metetmeteta lokti telongjem tenteta aliba agi government nem dena shisalen tajung agüja nübortem ajangzüksü atema telemtetba tajung agidaktsüba angur. Aji oda, kaketshir telongjem aliba agi government mapa nung inyaksü asoshi kümsük küm tashi nunga mapa bushir lanurtem ajangzükdaksütsüa telemtetba agidaktsür aser goverment mapa bushirtem rongnunga tendanger tajungtem rongnung tajungtibatem shimteta agitsüsa NPSC inyakyim tajungba kümdaksür aser NPSC agi mamsemba mapatem asoshi NSSB tentetdaksüogo. Kasaji, lokti telongjem tentet tashi itta aliba agi Nagaland nunga Municipal özüng anaben aseben tashi yanglushidaktsür ULB election agidaktsügo. Aji oda, tetsür lokti telongjem tashi itta aliba agi Nagaland ULB nung tetsürtem asoshi menden balaka shiteta yur election agiogo. Iba amaji lokti telongjem tenteta aliba agi government nem takangba agüja gari lenmang, power supply aser tzü tajemtsü agütsüba maparentem ajak shitak inyakdaksütsü meranger. Aji oda, lokti telongjem tenteta aliba agi government-ia item nüken tsüba akok tashi nebortem asoshi terenlok mapatem shitak inyaksütsü meranger. Itemji asen lima nung lokti tentet aika tenteta aliba tajangzüktem asütsü. Ajisüaka, ano külen, lokti tentet aika meshimetsütsü tentetba lokti telongjem amai inyakba angur. Item lokti tentettem nükjidongjibo "Telongjem ajanga Terenlok" asoshi inyaksüba masü saka "Meshimetsüa Chia ajemtsü" atema tentetba lokti amai inyaker. Item lokti tentettem jagi sentong tilaka yanglua yur tenla tulu imlaa tongti tesemdanger jaoktsü, saru kangtepa sarur benjong amungtsü aser sentsüh nung jubilee amungtsü aser mangatetep adoktsü. Atangji, tenla aser saru medeniang lokti telongjem ka tashi itta moutettsü, anungji züngsemtem rongnung saru alitsüla aser züngsemtem rongnung tenlateptsüla. Ajisüaka, itemji khurtetsa masü saka mulungsua pei akok agütsütettsüa inyakyim alitsüla. Asenoki sarusachi aser mapa bolu tali asüba agi lokti tentet maginer, saka lokti tentet melira asenok kija kija pei pei mapa inyaka, pei pei anogo nung pelateptsüba jagi jangramatem asütsü. Nisung yabo lokti kuma alitsü yangluba taküm lir, anungji lokti telongjem ka medeniang kija kibong mulung anisüngzüka melitettsü, anungji lokti aika tentetba atema menemnemli, saka lokti tenteta yur lokti teblemtsü aser lokti nungdak repringteta meinyakba asoshi dang nemnema ajungshitepdi.

## OLEMSABANG

### Kodanga Tatem Makaba Taküm Agütsüba Tesüngmangtsü Tsüngrem 0

~ L.Ngangshi Jamir, Mokochung Village

Temeshi Laishiba nung Lipok kaket nungi J.Adok kaket tashi tapu-tekong ajakji kasa dang tongtipang lir, saka tapu aser tekong balala shia jagi lenmang balala aser nungdak balala atema jembir. Anungji teküboklen agüja aliba Lai tekongtem ya-a ken züngdangdaksüner.

- I.
1. Tsürabur temenem atema ni par chirtem putu asem pezü tashi merenshitsü Anitet 20:5
2. Tsürabur tai atema chirnurdak semchisemnur dak putu asem buba aser pezü dak tashi mang ayanger. Anitet 34:7(b)
3. Ni sempaba tsürabur temenen yong par chirtem putu asem pezü tashi merenshiba tenükmba Tsüngrem ni lir. Tazüng Kunem 5:9(b)
4. Tsüraburtemi tsükmenatsü tasen achi aser chirnur tebu mejemer. Yer. 31:29
5. Onok tsüraburtemi temenen mena aser joko mali aser onoki parnok tai temenen khu abener. Ayatai 5:7
6. Shirnoki Kibuba tsübur parnok dak Kibuba temeim yimlibilemji tatem maka aser pa temeshibaji chirnur nungi chirnur tashi alitsü. T.Ken 103:17
7. Shibai pei artsüng sota ayur pai pei jabaso sempar, saka shibai pa meimer pai pa nendaka artsür. A.Shin 13:24
8. Kibuba tsübuba nung temulung alemtsü tulu lir, aser par chirnur jenokdak akatsü. A.Shin 14:26
9. Tangbo ni tambur kümogo, saka kü lanuwa nungi temeshipur senzüka yutsüba ni munguka mesüra par chirtem meshi metsüba ni munguka. T.Ken 37:25
10. Maksü beshiba jabaso madak shisa ka-a beshiba alar kati yimsu asütsü. A.Shin 17:2

Temeim külem tsüraburtem asenoki asen sülen chirnur, semchisemnur tia indang mepilemdangi tanü asen ajung asa-a dang inyakrabang aser libalirorabang Tsüngrem 0 nung ashi amaji asenoki a-azüka yutsüba atakatemi asüng parnok dangi arulanglang. Tanga kibong aika nung chirnur semchisemnurtem par tsüraburi bendena yutsüba atakatemi bener ayatai tia nung aliba asenoki ngudagi.

Kodanga meyzütetba Tsüngremer tsüngchi o ya asenoki ret-reta agidi, sürabang asen chirnur aser semchisemnurtemi atakatem masü saka alima senmang aser kotak senmang na bronglaji amangtetsü.

- II.
1. Pai ali nungi sensaker ajungketer aser maka-maiter reja nangtendak nungi ajungketer. T.Ken 113:7
2. Pai kü dang meim nungji ni pa kümsüktsü, pai kü nung shitet nung ni pa temalen mendaksütsü. Pai kü dang sarasademtsü aser ni pa dang langzüksü, timtem dang ni pa den alitsü, ni pa kümsüktsü aser akhüm agütsütsü. Arishi talang agüja ni pa jangratemdaksütsü, aser kü tekümtet pa dang sayutsü. T.Ken 91:14-16
3. Shiri Kibuba bushir parnok tajung kecha agia manüngtsü. T.Ken 34:10(b)
4. Tsüngrem asen jenokdak aser tashi, timtem nung anasatiba teyarir. T.Ken 46:1
5. Kibuba tsübuba jagi arishi atsülanger, saka tamajunger arishi tatsüba akümer. A.Shin 10:27
6. Timtem keter rongsen tulu akaba dang nungi Kibuba tsübuba den tera akaba tajungba. A.Shin 15:16
7. Nisung lenmang ajak pei nükdang temerük lir, saka Kibubai Tanela odanger. A.Shin 16:2
8. Tepela mulungjangji mozü tajung saka tanela teraksa jagi teret kongdaksür. A.Shin 17:22
9. Shibai sensaker dang aria bilemer pai Kibuba nem aputsür. A.Shin 19:17
10. Sensaker ayimdenba shibai mangashi yutsüdir, paia ayimdentsü saka pa dang mangashitsü. A.Shin 21:13
11. Nü kiyonger ki jagi ne tsüng züngteta dang odakjang, mesüra pai na laktettsü aser na sempatsü. A.Shin 25:17
12. Shibai pei tanela mazüokteter pa teraksa aser jara maketba yimti ka mesük. A.Shin 25:28

- III.
  1. Teyazü khuli memerenshi-i malitsü aser teyazü jembirji mejenbuttsü. A.Shin 19:5
  2. Nai nü kiyonger anema teyazü khuli teyi. Anitet 20:16
  3. Teyazü khuli memerenshi-i malitsü aser teyazü jembirji samatsü. A.Shin 19:9
  4. Tangar lendong madak pelarji memerenshi-i malitsü. A.Shin 17:5(b)
  5. Nai teyazü osang teprokshi aser tamajunger ka asoshi teyazü khuli ajanga teyari. Anitet 23:1
  6. Tamajung inyaksü asoshi telok tuluba sülen nai tanitak. Anitet 23:2
  7. Azü jangraba aser tekülak nisungi pei arishi küm tesadanga malitsü. T.Ken 55:23(b)
- Temeim adianutem, tangar ka ludaksütsü aser aidaksünudang asen sasa asen dak atakatem meteploksü asoshi kanga shisa ka-a aser kümdanga lidi arung ta tazünger ajak ayongzüker.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Australia nung network kati Arogo tasen 300 tentettsütsü



Reach Australia network national conference 2024 nung tangokba noksa nung angur.

**October 21, 2024:** Tawa Statista Research Department-i sangdongba report ka ajanga Australia nung Khristantem kanga ajema akümba jangjaogo saka Arogotemi iba linük nung Khrista osangtajung prokba wadang maneni inyaktüsü tebilemba lir.

2021 Australian Census nung Australia nung nütüng shilem 44-i parnok Khristan lir ta shiogo; ajisüaka 2016 küm nungbo Australia nung nütüng shilem 52-i parnok Khristantem lir, ta lemsatepa liasü, anungji küm pongu tsüngda Australia nung Khristan nütüng shilem 8 ajema kümogo, ta item osang ajanga bushiteter.

2010 küm Australia nung million 10 bo yimsü kecha mamangertem liasü saka tangbo ano Tsüngrem dak mamanger million 2 bendenlokogo.

“Australia nung lanur nütüng aika yimsü kecha dena sendaktepa mali mesüra Tsüngrem dak mamangertem lir,” ta Statista Research Department-i metetdaksü.

“Linük nung yimsü dak sendakba kiyimba sentong masü saka yimsü majangi kiyimba kanga bulua kumdar,” ta kasa osang ajanga metetdaksü.

Australia nung tanga yimsü

amangertem- Muslim, Hindu aser Buddhist yimsü amanger nütüngbo kanga renlokdar.

“Australia nung Khristan yimsü amangertem tanemtanemi tajemba akümer, saka tanga yimsübo tanemtanemi renlokdar,” ta Statistica Research Department-i metetdaksü.

Linük nung tesüsabuba nütüng yongsük züngdangba sülen Muslim nungertembo tanur-tain aika renlokogo, ta kasa osang ajanga metetdaksü.

Australia nung Khristantem ajema akümyonga Arogo kar aser Arogo networks kari linük nung nüburttem den maneni Khrista osangtajung lemsateper, aser parnok 2030 küm tashi nungbo Arogo tasen 300 tentettsütsü nükjidong nung inyaker.

Arogo 260 densema aliba network- Reach Australia-i Australia nung ajak den Khrista osangtajung lemsateptsü atema kanga meranga inyaker.

Taküm May ita nung Reach Australia network national conference nung jembidang Plant Director, Derek Hanna-i, Tsüngrem dak tamang yur maneni Khristar wadang inyaktüsü asoshi ayongzüka liasü.

“State of the Nation in Church Planting” onük nung o

lemtepdang Hanna-i 2030 küm tashi nungbo Australia nung Arogo 300 tentettsütsü nükjidong yur inyakba osang metetdaksü.

Tang tashi nung network-i Arogo tasen 145 bo tentettsüogo aser taruba küm trok tsüngda tanünga Arogo 155 tentettsütsü atema Khristan lenir 800 nungdaker, ta metetdaksü.

Hanna-isa, “Nenoki iba ya tamakoktsü, ta bilema alitsü akok saka asenok takdang ka nung külemi mena lir, aser asenok ajaki Tsüngremi Yisu Khrista tasü nungi shia arudaktsüba nung amanger. Ibaji tamakoktsü amai, saka asenok ajak tasü liasü saka asenok Khrista nung taküm lir, ta asenoki amanger,” ta metetdaksü.

Tesüiba küm 20 tsüngda network-i inyakba mapatem asadagra tarutsü nunga asenoki mapa tulu inyaktettsü aser Arogo tasen 300 tentettsütsü nükjidongji ataloktsü, ta Hanna-i ashi.

“Iba takdang nung mena alirtem reprangdang. Denomination balala nungi nisung 1,300-i Australia nung Khrista osangtajung proktsü atema tan hopta piyong asenoki jembia aruogo. Iba ya Tsüngremi inyakba mapa lir,” ta Hanna-isa metetdaksü.

## Indonesia nung Khristantemi sorkar tasenba dak teimla akar

**October 21, 2024:** October 20, 2024 nungi tenzüka Indonesia nung Tir aser tatong Tir tasenba nati yimsüsü tenzükogo; ajioda iba linük nung Khristantemi sorkar tasenba kübok tamangertem anisüngzüka alitsü teimla akar, ta International Christian Concern (ICC)-i metetdaksü.

Indonesia nung Khristan nütüng million 30 jungnüa lir.

Tir tasenba, Prabowo Subianto-i Tir Joko “Jokowi” Widodo melenzükogo aser tatong Tir tasenba Gibran Rakabuming Raka-i KH. Ma’ruf Amin melenzükogo.

Tir tasenba, Subianto ya taoba mapang sepai general ka liasü aser pai 2014 aser 2019 kümtem nunga Tir

election nung toktep aser taküm election nung pai vote shilem 58 nguteta Tir election nung takok angu. Indonesia nung nütüng shilem 11 shi Khristantem lir aser nütüng shilem 87 Muslim nungertem lir.

Taküm February ita nung Tir election mapang Khristantem aikati shiba nem vote agütsütsü ta ratamata liasü. Taoba election nungbo Khristantem teimbakati, Widodo-i Khristantem temeden kümzüksü ta amanga pa yaria liasü saka tan election nungbo Khristan aikati Subianto yariogo.

Indonesia nung sorkari Khristantem reshikangshi masür ajisüaka sorkari

Khristantem temeden atema-a meinyaker.

Iba linük nung Khristantemi sademsadema tekülem sentongtem agiteter saka tanga yimsü amangertem den Khrista osngtajung lemsateptsübo memelar. Anungji iba linük nung Muslim nungertem Khristan yimsü dangi meyipdaksütsü kanga tasak.

Khristan kari danga Muslim nung den osangtajung lemsatepa Khristan yimsü dangi meyipdaksütsü parnok kibongtem, lisopurtem aser sorkartemi temerenshi tulu agütsür.

Indonesia nung Tenla ki tasen asütsü atema temelaba angutsü kanga tasak. Sorkar temzüng kübok, Tenla ki

## ANOGO ABEN TSÜNGREM DEN

### Asenok Tekümzüker

- T.Ken 140: 1-13

Dawid ano tongpang rara ka ajanga aotsü liasü. Pa tsükchiri amakba nungi kümzüksü nungdaka liasü. "O Kibuba, nisung tamajung nungi ni kümzükanigma: Shirnoki pei mulungjang nung tasa tamajung asar; maneni parnoki parnok sasa rara asoshi senteper. Per ama parnoki parnok tepu chiradaksür. Ungyang per miim parnok tebang mechi telung nung lir. O Kibuba, tamajunger ket nungi ni kümzüka yuang; tesashi nisung nungi kümzükanigma; shirnoki kü jenzang mekepdoktsü tasa asar" (t 1-4). Dawid tsükchirtemi pa aputsü meyima sang yanglu.

Nai iba tia ajurura kechi inyaktüsü- tamajung tesashi nisung, na aputsü mazüngi sang yanglur nisungtem? Tsüngremi ne dang angashir ta bilemtetang. "Ni Kibuba dang ashi, Na kü Tsüngrem lir; kü temepishiba ola nung tenarong tenjang, O Kibuba" (t.6). Tsüngremi na tashi itdaksür. "O Tsüngrem, kü tekümtet asoshi tashi tongpang anogo nung nai kü kolak tongbangtsür" (t.7). Na tsükchir anema rarai aotsüsa kümra Tsüngremi na raraba sobutsü sobujang. Tatemsa, Tsüngremi na metenzang. Dawidi Tsüngremi pa metentsü ta sarasadem aser pa tsükchirtem parnok menen agi parnok raksatsütsü.

Dawidi Tsüngrem nem tenüngsang agüja aten. "Ni metet tepetzükba pur asoshi aser sensaker tim mapa asoshi Kibuba noktaksü. Atangji ochishiri ne tenüng nung tenüngsang agütsütsü; Tamayazür Ne tsüngdang alitsü" (t. 12, 13). Raraji temogo, pai ashi, "Kenü anogo ni Na alidak alitsü, kong tiyazü, mezüngmeshi, tongpang rara mesüra temenen joko mali." Asenok Tsüngrem tesünep nung teti pelaa alitsü.

Na tamanger ka süra Tsüngrem temenen temerenshi nungi kümzüksü Pai mapa inyaker. Tsükchirtemi ne tenüng tajung mezüngmeshir. Tsüngrem dang teyari asoshi jang. Pai ne dang angashitsü, na tashi itdaksütsü, na metentsütsü. Tanü Pai n e nem takok ngudakjang.

## Küm 6 tsüngda alima nung baptiba shilem 15 agi tajemba kümogo

**October 21, 2024:** Tesüiba küm trok tsüngda alima tesem ajaklen Arogoi baptitsüba kanga ajema kümogo; 2016 küm alima nung nisung million 16 baptia liasü saka 2022 küm nungbo nisung million 13 (13,327,037)

dang bapti, ta osang ka ajanga metetdaksü.

2016 küm alima tesem balala nung baptiba denji medemdangra tesüba küm trok tsüngda alima nung baptiba shilem 17 agia tajemba kümogo.

1991 küm alima nung nisung million 18.1 baptia liasü, 1998 küm nisung 91, 17,932,891 bapti aser 2000 küm nisung 18,408,076 baptia liasü.

2001 küm nungi 2016 küm tashi nung alima tesem balala nung küm shia baptibaji million 16 nungi million 18 tsüngda liasü, ajisüaka 2015 küm nungbo nisung million 16 den ishiba baptia liasü, ta kasa osang ajanga metetdaksü.

Alima nung baptiba züngya tajemba akümba ya 2020 küm sangdonga liasü. Iba küm alima tesem balala nung coronavirus wara ajanga tenokdangba balala liasü, ibayongji 2020 küm nisung million 14 dang baptia liasü.

2021 küm nunga nisung million 13.7 dang bapti aser 2022 küm nisung 13,327,037 baptia liasü.

densema tekülem ki balala asütsü atema kiyong nung alirtem ajaki melungtsü nungdak; yamaji asü nungang tekülem ki asütsü atema sorkari temelaba agütsür. 2006 küm Home Ministry aser Ministry for Religious Affairs nati tekülem ki tasen asütsü atema tamanger 90 indang signature aser kiyong nung alirtem indang signature 60 agütsü lemteta liasü.

Ajisüaka Khristantem densema minorities-ibo signature peria mengutetba ajanga tekülem ki asütsü atema temelaba angutsü kanga tasak, kechiyong kiyong aika nung Muslim nung nütüng teimba lir aser parnok Tenla ki tasen asüba anema nokdaker.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Taoksatsü**

(adj) ajungbena meimlaba osang tamajung (shocking)

\*Tsürabur asüba osangji taoksatsü osang liasü.

**Taoktsü**

(n) janaona endokba mesüra oktokba oset, kiektsü (broom)

\* Lanurtem shiai taoktsü bener arua yimti yimdong oktok.

**OLONG PAITEP # 6958**

|    |   |    |    |    |    |    |   |    |    |
|----|---|----|----|----|----|----|---|----|----|
| 1  |   | 2  |    |    | 3  |    | 4 |    | 5  |
|    |   |    |    | 6  |    |    |   |    |    |
|    |   |    |    |    |    |    |   |    |    |
|    | 7 |    | 8  |    |    |    |   |    |    |
| 9  |   |    |    |    | 10 |    |   | 11 | 12 |
|    |   |    | 13 |    | 14 | 15 |   |    |    |
| 16 |   |    |    |    | 17 |    |   | 18 |    |
|    |   |    |    | 19 | 20 |    |   |    |    |
| 21 |   | 22 |    |    |    |    |   |    | 23 |
| 24 |   |    |    |    |    |    |   |    |    |
|    |   |    |    |    |    |    |   |    |    |

**TIPIEN**

- 1. Saku - (4)
- 6. Songjen - (7)
- 7. Mali/Tazüing - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi tsüker - (3)
- 17. Aso tila - (6)
- 20. Tashi maküm - (4)
- 24. Tenüing kasa jatapba - (7)
- 25. Ki yangluba oset - (4)

**LANGTSÜNGLEN**

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüingdang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. \_\_\_ tatsü - (3)
- 12. Tebur kidong aser zünga kasa tsüingdajatepba - (4)
- 14. Pela agizükba tapu ka - (5)
- 15. Tenüing atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

**OLONG PAITEP # 6957 TELANGZÜBA**

**TIPIEN :**

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

**LANGTSÜNGLEN :**

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüingdak, 10. Yongya,
- 11. Kongro, 13. Ora, 14. Ata.

**NAI-A YA METETTER MA**



Abu Dhabi Entertainment Company (ADEC) ajanga "Largest Ball Pit in the World" atema Guinness World Record ka angutsü meranger. ADEC ya Mubadala group nung shilem ka lir aser parnoki Mansour, The Festival nung Largest Ball Pit yanglutsü. Iba nung interactive features, inflatables aser colourful balls alitsü. Iba benjung ya Zayed Sports City nung November 15-17 amongtsü aser Mubadala o Abu Dhabi Early Childhood Authority teloktemi yariteper.

**Mozü shibelenertem küm**  
**10 tepuokdak ayutsü**

Aizawl, October 21, 2024 (Agencies): Mizoram kübok Champhai district nung special court kati nisung anati heroin shibelenba atema küm 10 tepuokdak ayutsü aser nisung shia dang Rs 2 lakh senchi achitsü obendang agütsüogo.

Joseph aser Lalrosanga na ya yaküm April 26 nü Khawzawl district nung aliba Tuisenphai police check gate nung apu. Tena ket nung Rs 40 lakh alang heroin gram 897 bena liasü.

Narcotic Drugs and Psychotropic Substance Act, 1985 kübok tena anema ken o benoka liasü.



Office of the  
**AO RIJU**  
MOKOKCHUNG : NAGALAND - 798601  
"Kenozülu Yinsem"

Ref.No. AR/AT-SD/2024/08

Date: 21-10-2024

**AO RIJU SANGDONG**

Ao Riju-i (Ao Academy) achaayanga agiba Arangtet Tatidang (A.T) 2024 Tanabubaren Yimpoksüi 7-9, 2024 anogotem nung agütsü Zonizung nung enoka liaka koda masüba maparen kar ajanga iba tatidang Aenjeti 22-24, 2025 anogotem nungang agütsü melenshir. Anungji ano shirnokisa iba tatidang agütsünür Yimpoksüi 30, 2024 tatem tashi nung shiyim (Form) mezüing sangdonga aliba tesemtem nungi (Dimapur, Kohima aser Ao Riju office) angutsü. Tatidang koba tesem nungsa agütsü jelia osang agütsütsü.

Sd/-  
Rev. Prof. Rongsen Lkr  
Chairman

(I. Temjen Tzüdir)  
PH & Coordinator

**Kelulu Dawhuo-i Miss Kohima 2024 takok korang angu**



**Kohima, October 21, 2024 (TYO):** Hombarnü Kelulu Dawhuo nem Miss Kohima 2024 takok korang semtsüogo.

Iba sentong ya 4FRONT Event Managements-i Kohima College Kohima (KCK) nung ayongzük aser KCK-i event & venue partner ama yaritep.

Iba sentong atema choreographer Pewe Tunyi Khamo aser show director

Theja Sekhose na liasü. Miss Kohima 2024 Dawhuo nem Rs 20,000 senpet aser Rs. 30,000 alang gift hampers agütsü.

Taküm tetoktepba nung tanabuba jenjang nung Anon Konyak aser tasembuba jenjang nung Merilo M Kikon nati takok nguogo. Anon nem Rs. 15,000 senpet den Rs. 30,000 alang gift hampers aser Merilo nem Rs. 10,000 senpet den Rs. 30,000

alang gift hampers agütsü.

Sentong nung MLA & District Planning and Development Board (DPDB) Kohima Chairman Dr. Tseilhoutuo Rhutso-i tetushi süa jaoker aser Kohima Deputy Commissioner Kumar Ramnikant-i alakteta jaoker ama shilem agi.

Miss Kohima 2024 atema designers ji Kezhaselie Seyie, Kevisedenuo Khezhe aser Adaphro Seshuna aser make-up artist ji Johnny D'Ascolli nungner liasü.

Maneni, Mele Pucho, Ruopfuzhano Whiso, Abienuo Jasmine Ashao aser Dr. Theyiesinuo Keditsu nungner tetendanger ama shilem agi.

**Subtitles winners:**

Miss Talent - Merilo M Kikon; Miss Multimedia - Sharon Konyak; Miss Beautiful Smile - Sharon Konyak; Miss Perfect 10 - Kelulu Dawhuo; Miss congeniality - Seyievinuo Rupreo and Best evening gown - Anon Konyak.

**NPF Mkg.Div-i Naga lima nung Regional Party tentetba anogo nüngtemmong among**



**Mokokchung, October/ Mongputeni (TYO):** Naga lima nung Regional Party tenteter küm 62 ajungba nüngtem nung tanu October 21 nü Naga People's Front Mokokchung Division office nung 62nd Foundation Day sentong ka agiogo.

Iba sentong nung Mokokchung district nungi Naga People's Front Central

office nung Vice President ana(2) Wb.Lanukaba aser Wb.Yangerlemba tena dena liasü.

Sentong nung Wb.Lanukaba ajanga NPF nükjidong "Fide non Armies" ta asübaji shinga dena merarai Indo-Naga political ken o maparen takok ngua inyaktsüba nükjidong aliba rasaa ashi.

Sentong nungsa

Wb.Yangerlemba-i NPF party tashi ita alitsü asoshi ajaki inyaktsüla aser tang India sorkar den yimjung ken o jembiba ya nungitsüla ta lemsatop.

Iba sentong nung adenertemi NPF party tashi ita aotsü asoshi bendanga agüja inyakts asoshi shisa lemsatopba mapang agi aser tatem telok külemi sarasadema sentong tembanga liasü.

### Seoul-i Moscow dang Russia nungi N.Korea sepaitem ainshidaktsütsü ashi

Seoul, Mongputeni/Oct, 21 (Agencies): Hombarnü South Korea-i Russian ambassador to Seoul jaoka Ukraine nung raraba nung Russia yaritsü atema Pyongyang-i sepai meyirijang aika yoktsü telemtetba agiba aitsü aser tekeratiba nung ainshidaktsütsü ashi, ta foreign ministry sangdong ka ajanga ashi.

North Korean special forces sepai 1,500 shi Russia nung lir aser parnok ya kobi melie front line leni aotsü, ta Seoul indang itdangiter temi Hokulbarnü ashi aser ano sepai tali yakta yoktsü, koba Pyongyang-i bendang limai par sepai yokba mezüngbuba alitsü.

Nuclear nok-nü aliba North Korea-i Ukraine nung amshitsü atema Russia nem nok-nü agütsür ta South Korea-i mapang talangka nungi jembia arur aser ano sepaitem yokba indang tebilemtsüa lemsatepa liasü, koba Kim Jong Un aser Russia Tir Vladimir Putin tsüngta June ita military deal ka zülutepba sülen ataloker alitsü.

Tawa North Korea-i Russia dangi sepai yokba asoshi Seoul-i temulung nung shishia bilemba indang South Korea indang vice foreign minister Kim Hong-kyun-i lemsatep aser tekeratiba nung North

Korean sepaitem tem lir aser tang parnok ya Russia indang Far East nung military bases balala nung anenzüka lir. Parnok ya 'acclimatisation training' tembangba sülen Ukraine nung front lines leni yoktsü imlar, ta NIS ajanga ashir.

North Korea-i Russia nem Ukraine nung raratsü asoshi nok-nü aser sepai agütsüba ya South Korea atema kisüng masü saka linük ajunga asoshi security tsütsü timtem tulu lir, ta Kim-i Russian ambassador to South Korea, Georgiy Zinoviev dang ashi.

Iba ama inyakyim yagi UN Security Council pangzüng aser UN Charter nung aibelener ta pai nenshia ashi.

Hokulbarnü Seoul indang National Intelligence Service (NIS) ajanga satellite noksa tem sayuba nung elite North Korean sepaitem Russian military vessels amshia Vladivostok-i anir aoba nguogo. October 8 aser 18 tsüngta Russian Navy transport ship amshia North Korea-i par special forces tem Russia-i anir ao, anungji Moscow-i Ukraine nung raraba nung North Korea mitkari shilem agi tenzükba jangjar, ta NIS ajanga ashi.

Sepai telok mezüngbuba ya North Korea indang Special Operations Forces (Storm Corps ta ajar) nungi elite unit

tem lir aser tang parnok ya Russia indang Far East nung military bases balala nung anenzüka lir. Parnok ya 'acclimatisation training' tembangba sülen Ukraine nung front lines leni yoktsü imlar, ta NIS ajanga ashir.

North-i August ita nungi Russia nem containers 13,000 dak tema tema agütsüogo, kong artillery shells, missiles, anti-tank rockets aser danga nok-nü tesashi lir, ta NIS-isa Hokulbarnü shia liasü.

World War II sülen North Korea linük kumtetba sülen Pyongyang aser Moscow ya tembar süa arur aser Russia-i 2022 küm Ukraine amakba sülen ano tesendaktep tali tajungba akumer.

Taoba hopta Ukraine Tir Volodymyr Zelensky-i sangdong ka nung, Kyiv den raraba nung Russia yaritsü atema North Korea-i sepai 10,000 nem training agütsür aser Moscow takoksa ajurur aliba mekepbangtsü asoshi North dak metaloker, ta shia liasü.

Ukraine nungeri missile amshia Russia nunger kübok aliba Donetsk anasa tesem ka amakdang North Korean military officers trok tepset, ta ita tetenzüklen Ukrainian media ajanga ashiba ya shidak alitsü, ta South Korea-ia ashir.

### MULUNGNEN O



Late P. Aolemla Tzüdir 14.09.1966 - 15.10.2024

Onoki teti meima aliba asür Mrs. P. Aolemla Tzüdir, la shirang yipden nung alidang nungi akümüli wadang tempang tashi nung kija, kibong, Arogo, medemer aser lokti balala shirnokisa ozü asükhu nung nübu, rongsen aser Sarasadem agi Yaritepogo nenok ajak dang kanga pelar.

Onoki nenok nem meyipa kecha magütsütetaka nenok temeim mapatem kodanga mamatettsü. Tulusang Tsüngremi nenok taküm moajang ta ozü tamang Sarasadem.

- Temeim Kinungbo aser Kinungertem.

### SANGDONGER

Chuchuyimpang Mongoya Prayer Garden nung 25th – 27th October, 2024, anogo asem (3), Healing Crusade sentong agitsü renema lir. Anungji nübur shirnok shi aser Tanela nung taneptsü aginüa ali, temulunger ajak arua iba sentong nung Tsüngremer temoatsü agitsü pelashishia jaoker.

--- Mapang telemsa ---

Aonung – 5:00 PM; Anepdang – 9:00 A.M  
Tongtepratepdak : 9856486841 / 8258802047

### EU nung Moldova züngsem akumtsü

Chisinau, Mongputeni/Oct. 21 (Agencies): Moldova nübur tera agi timbai European Union (EU) nung züngsem akumtsü mulunga vote agütsüogo, ta election ketdangsür temi ashi. Kidanger linük Ukraine nung raraba mapang iba vote nung Russia tetsüngtai aitsü merang ta tai tonglokja aliba mapang ka nung iba osang ya arur.

Hombarnü vote ajunga amai azüngba mapang EU nung züngsem akumtsü mulunger vote shilem 50.39 lir aser memulunger vote shilem 49.61 lir, ta election commission ajanga ashi.

Kasa mapang EU odongtar kati ashiba agi, EU nung Moldova adentsü atema vote agitepba mapang Russia mesüra par proxy tem tetsüngtai aita kanga timtem agütsü. "Iba vote agitsü lia Russia aser par proxy temi Moldova amokmerena shilem agitsü merang," ta odongtari ashi.

Tir Maia Sandu, shiba tanaben election nung tokteper, laia 'ozü linük temeden aser democracy nung tashiyim amshir' ta shia liasü. Ghonda ishika tejakdang results shilem kar sayuba nung EU nung adentsü memulunger ya shilem 55 nungi 57 tsüngta liasü.

prokshia aliba EU bhukumer timba aliba indang vote tem tatemlen azüngba ajanga tatemlen mulunger timba akum, ta teshisadanger temi ashir.

Tetsüngta tulu nung takok mongutetaka iba results ya EU bhukumba Tir Sandu-i aginüba ama lir, shiba Deobarnü tir election agitsü aliba nung tokteper.

Iba referendum aser tir election ya Russia den maneni tesendaktep alitsü asü mesüra mapang talangka agiaka EU nung adentsü atema tetendangba ka amai lir.

Tir election nung Sandu den tokteper tongti, taoba Prosecutor General Alexandr Stoianoglo yagi vote shilem 26.32 ngutetba yong November 3 nü election agishitsüsa akum.

Candidate katia vote shilem 50 mongutetra ano electroion agishitsü.

Stoianoglo-i tir inyaktsü shimtetra EU, United States, Russia aser China linüktem den tesendaktep densema foreign policy yanglutsü ta ashi.

Sandu-i Deobarnü Moldova nunger dang sangdong ka nung, Moldova tejangraba anema inyakba bendanger tashi den mapa tamajung inyakba telok lungjemba kuli tejangja lir aser votes 300,000 alitsü meranger, ta shia liasü.

Linük tir election nungya Russia nung alir fugitive tycoon Ilan Shor tetsüngtai aiter ta aitsür. Moscow-i shilem magir ta ashir aser Shor-ia mapa

### Israel-i Lebanon nung Hezbollah den sendaktepa aliba telok amak

Beirut, Mongputeni/October 21 (Agencies): Israel-i anüng ajanga Lebanon nung Hezbollah den sendaktepba aliba lokti tentet ka tamendakdak makogo, aser Hezbollah nem prangbong injang aser hadir balala alitsü atema senotsü teyari agütsüba atema aitsüogo.

Lebanon nung iba telok tamendakdak amakba ajanga Israel army-i parnok inyakyim atsülangshia military tamendakdak dang masü saka Hezbollah nem teyari agütsürtem dena amakba sayur.

Southern Lebanon nung Israel-i manger mesangwa tsüngda Nabatieh aser Tyre yimti nung Al-Qard al-Hassan indang kongsangtem maka liasü, ta National News Agency (NNA) ketdangsürtemi metetdaksü.

Israel military-i Hombarnü ashiba agi, parnoki Beirut aser southern Lebanon nung Hezbollah puri amshiba facility aser tesemtem aika makogo, kong iba financial institution indang kongsangtem densema lir. Israel nunger sepaitemi

Hezbollah nem teyari balala agütsüba ajak nokdangtsü asoshi jenjang agiba mapang ka lir.

Hezbollah pur kiralongrar inyakyim balala inyaktsü atema senotsü teyari agütsüba atema Israel-i Al-Qard al-Hassan aitsüogo, kong prangbong injang aser hadir balala alitsü aser sepaitem nem taah agütsütsü asoshi senotsü agütsüba densema lir.

Al-Qard al-Hassan ya Hezbollah den sendaktepa aliba financial firm ka lir shirnoki küm pongu tejakdang rongsenketzüng chirepa traditional banking system chireper aliba linük nung microcredit agüja arudar.

Al-Qard al-Hassan pur indang facility balala amakba ajanga Hezbollah den ita ka shi rara aruba mapang Israel-i parnok inyakyim atsülangshiba sayur.

Deobarnü Israel-i Beirut indang southern suburb tem 11 ben maka liasü, ta NNA-i metetdaksü aser timba ka Al-Qard al-Hassan dak rangloker maka liasü. Kasa mapang nung ano Lebanon antoklen aser

anüoletiplen Al-Qard al-Hassan indang kongsangtem makogo.

NNA-isa, Beirut indang airport anasa tesem ka amakba metetdaksüogo, koba linüki humanitarian teyari balala aitba tongtibangtiba tesem aser linük toktsür jena aoertemi amshiba lenmang tongtiba lir.

Israeli Defence Minister Yoav Gallant-i Deobarnü sepaitem dang ashiba agi, military-i Lebanon nung Hezbollah pur tali amak tenzükogo aser parnoki Israel amaktsü atema amshiba tesemtem aika raksatsüogo.

Kasa mapang nung Israel military-i Deobarnü sangdong ka ajanga northern Gaza nung brigade commander ka asüba osang jangjashitsüogo, kong Israel nunger sepaitem Hamas pur samatsütsü asoshi raraba mapang ka lir.

401st Brigade commander Colonel Ahsan Daksa ya Jabalia temeket nung pa indang tank toktsür aoba mapang bomb ka agi kongshiba sülen tepseta liasü, ta military otongdar Rear Admiral Daniel Hagari-i ashi.

(Maneni tapak 8 nung...)

# Sumi Wrestling Association training camp tenzükogo



NWA ketdangsürtem, coach tem, SWA ketdangsürtem, lenirtem aser camp nung shilem agirtem tangokba noksa nung angur.

**Pughoboto, Mongputeni/October 21 (TYO):** Nagaland Wrestling Association (NWA), tawabangka kübok Sumi Wrestling Association (SWA) aser NWA na longjemmer Hombarnü anogo 10 atema Wrestling Training Camp ka Town Hall, Pughoboto Town nung tenzükogo.

Iba camp lapokba sentong nung NWA Vice President (General) Viketouzo Meyase alakteta jaoker liasü, shibai tetsü tebou mapang nungi asaya aruba asaya ka ama wrestling asaya ya koda tongtibang iba indang lemsatepa liasü. Meyase-isa, saisapong ajanga wadang balala nungi nüburtem longjemdaksür aser lokti tejakdangi anir, ta ashi.

Tawa Dehradun nung October 3 nungi 6 tashi AITWPF 12 National Traditional Wrestling & Pankration Championship 2024 nung NWA-i shilem agiba indang pai lemsatep. Iba asayamung nung NWA-i medal 54 angu, koba otsü tasen ka

liasü, ta pai ashi. Meyase-isa, taküm November 17 nungi 23 tashi Asian Belt Wrestling Championship asayatsü aliba indang metetdaksü, kong Africa linük ana aser Europe linük asem nungi aser Asia linük 20 dak tema nungi asayartem arua shilem agitsü jangjaogo, ta metetdaksü, ajisüaka tetsükdaksü kar aliba ajanga iba asayamung ya atsülangtsü akok ta pai ashi.

Pai, Asian championship mapang Naga Style of wrestling ya medal event ka asütsü ta shia Sumi nungertem dang NWA championships nung shilem agitsü ayongzükä liasü.

Maneni Meyase-i, iba amala mesükba training sentong ya Lotha Wrestling Association (LWA) aser Pochury Wrestling Association (PWA) natia ayongzükä agiogo aser Rengma Wrestling Association (RWA)-i ayongzükä October 14 nü nungi tagidak lir ta metetdaksü.

NWA tenüng nung Meyase-i 17buba International Naga

Wrestling Championship 2024, koba December 4 nü Khouchiezie nung asayatsü lir, iba asayamung nung shilem agitsü atema SWA wrestler tem jaoka liasü.

Tetsür 5 densema wrestler 26 iba camp nung shilem agitsü atema züngoksemer lir.

NWA wrestlers Kewecholo Akami, Rüüzetuo Visienyü aser Puikube Zeliang nungeri camp mapang training agütsütsü.

Kasa mapang nung SWA tir N. Kitoshe Kiho-i, Sumi nungertem atema wrestling asaya ya asaya tasen ka masü ta ashiba den Sumi Wrestling association ya 2024 küm tentet aser tang anogo 10 atema training camp ayongzükba ya wrestling asaya asüngsashiba ka lir ta shia NWA nung shilem agitsü atema jaokba atema kanga pelaba lemsatepa liasü.

Camp lapokba sentong ya Tokiho Swu, General Secretary SWA lenisüba nung agi aser Kipitoli Shohe, Associate Pastor (Childre), PTBC-i sarasadema liasü.

# Anogo 348 sülen Gavi asaya tenzükogo

**Mongputeni/October 21, 2024 (Agencies):** Barcelona midfielder Gavi-i Deobarnü ashiba agi, ita 11 tejakdang anterior cruciate ligament yiruba sülen tanaben meyipa arua asayartetba atema kanga pelar.

Arishi küm 20 tain asayar ya taoba küm Euro 2024 atema Spain team Georgia den qualifying asayaba mapang yiru aser season tepeyong masayartetba den Spain-i Euro akokba asayamung nunga masayartetba liasü.

Pa Deobarnü La Liga nung Barcelona puri goal 5-1 agi Sevilla akokba asaya nung substitute ama ia asaya liasü.

“Ni meyipa arur team nungi asayartetba atema pelar. Ni iba mapang atema ita aika yongya ataogo aser ni ajak dang kanga pelar, kechiyong parnok ni meyipa arur asayatsü atema teyari agüja liasü,” ta Gavi-i Movistar Plus dang ashi.

“Ni yirur aliba mapang tamajungtibaji teammate tem den masayartetba ya liasü. Kima nungi team asayaba reprangtsü kanga tasak liasü aser iba ajanga mapang ajak takok tashi jangradema intoktsü aser takaba aser tatalokba balala asoshi tenüngsanga alitsü angazükä liasü.

“Ni taneptsü ngur tanü idaki

arutetba atema kanga tiaka bilemer, kechiyong iba ya kü takümaser ni taküm tepeyong iba ya dang inyaka aru aser kanga menungra liasü,” ta pai ashi.

La Liga nung point 27 ngua Barcelona pur tang temaba jenjang nung lir. Parnok tanabuba jenjang nung aliba Real Madrid dang nungi point asem aser tasembuba jenjang nung aliba Atletico Madrid dang nungi point tenet agi timba lir.

Champions League nung Bodhbarnü parnok kidang Bayern Munich den asayatsü lir aser iba sülen Honibarnü LaLiga nung Real Madrid den asayatsü.



asayadaki. Asayamung lapokba sentong nung asayartem den alakteta jaoker metetpelaba mapang tangokba noksa nung angur.

MP Rajya Sabha, S. Phangnon Konyak-i October 21 nü 32buba Loyem Memorial Trophy 2024 tenzüktsüogo. Iba asayamung ya “Football Towards Harmony” omen nung ajemdaker at Loyem Memorial Astro Turf Ground, Tuensang nung

# Archery World Cup: Deepika Kumari-i silver medal angu

**Mongputeni/October 21, 2024 (Agencies):** India tsürtem rongnungi recurve archer Deepika Kumari-i Tlaxcala, Mexico nung World Cup Final nung la asoshi silver medal pongububa nguogo. Final nung lai China tsür Li Jiaman-i 0-6 agi mekoki liasü.

2022 küm December ita jala ka soa bentsüba sülen küm asem buba nung Kumari maneni meyipa arur World Cup Final nung asaya aser asayar ti rongnung la seed tasembuba liasü.

Semifinal nung lai kanga junga asaya-a asaya akok, ajisüaka gold medal atema asayaba mapang lai Li Jiaman mekoktet, shibai taküm Paris Olympics nung team asaya nung silver medal ka ngur lir.

Taküm iba WC nung shilem agiba densema Deepika-i World Cup Final tekububa nung shilem agiogo aser lai taoba mapanga bronze medal-a ka ngur lir.

India nunger asayartem rongnungi Dola Banerjee-i dang World Cup Final nung gold medal ka ngur lir. Pai 2007 küm Dubai nung asayaba mapang gold medal ka ngua liasü.

Tebur recurve asaya nung Dhiraj Bommadevara mezüngbuba round nung 4-2 agi tejakang liasü, ajisüaka pai Paris Olympics nung bronze medal ngur aliba South Korea

nunger asayar Lee Woo Seok mekoki kanga kara tsukatok.

Iba asayamung nung India nunger compound archer asem aser recurve archer anati shilem agi aser parnok ajak senteper medal ka dang ngua liasü.

Semifinal nung Mexico tsür Alejandra Valencia kanga junga akokba sülen Deepika-i final nungbo semi nung asayaba ama masayartetba liasü.

Lai mezüngbuba set point (26-27) ka agi makok. Tanabuba set nung tajungba asayartetba Li-i aibelen mesüi asaya point 30 anguba ajanga asaya mekoktet aser China tsür la ya 2-0 agi tekjakkdang (30-28) aküm.

Tasembuba set nung Deepika-i tanabenbuba akhaba mapang 7-ring nung kashiba sülen Li-i 9s nung asemben khashia asaya 27-25 agi akok aser gold medal ngua liasü. La tang mezüngbuba World Cup Final nung asaya liasü.

Semifinal nung Deepika-i Paris Olympics bronze medalist Valencia, 6-4 (29-28, 26-26, 26-29, 28-28, 28-27) agi koka liasü.

Compound asaya nung India nunger asayar aseme medal ka danga monguteti teka tazüng kidangi meyipa aruogo.

Prathamesh Fuge semifinal nung tsük aser Priyansh aser Jyothi Surekha Vennam na medal round metongtet.

## BENDANGLI OSANG : Tapak 7 nungi...

### Israel-i Lebanon nung Hezbollah...

Defence Minister Yoav Gallant-ia tanga sangdong ka ajanga Daksa ya Hamas kiralongrartem den raratepba mapang asü ta metetdaksüogo.

Hagari-isa, iba lendong nung tanga battalion commander ka aser ketdangsür ana terara yirua liasü, ta metetdaksü.

Parnok iba tesem asadangtsü atema gari telung nungi adokba mapang bomb ka agi kongshia liasü, ta pai ashi.

Arishi küm 41 tain Daksa ya Druze community nungi züngsem ka liasü aser pa ita pezü tejakdang brigade commander asütsü shim. Gaza nung küm ka tepeyong raraba mapang asüba army commander tem rongnung pa tejentiba liasü.

Pai aniba brigade ya tejakdang sür Jabalia nung Hamas pur makdar, ta Hagari-i ashi.

Israel nunger sepaitemi

October 6 nü nungi ali aser anüng ajanga Jabalia aser tanga tesemtem amak tenzük aser military-i ashiba agi, Hamas pur asüngsashiba nokdangtsü nükjidong nung parnok iba jenjang agir.

Hamas-i azüoker aliba tesem nung civil defence agency-i ashiba agi, iba tesem hopta ana tashi amakba mapang nisung 400 dak tema tepsetogo.

2006 küm Israel aser Hezbollah na raraba mapang yirur aliba sepaitem kümzükba atema Daksa nem tetushi agütsür liasü.

Israel tir Isaac Herzog ya Daksa ya “hero” ka aser pa asüba ya Israel aser Israel nunger lokti tentet atema takoksa tulu lir ta ashi.

Pa asüba sülen Gaza rara nung Israel nunger sepa asür 358 jungogo. Israel aser Hamas na 2023 küm October 27 nü nungi tang tashi tanen makai rara arudar.

## BILEMDANGANG

“Aongmetang masü ola tejangja asütsü merangang.”